

आकाशवाणी

खबरां जगमोहन शर्मा कोला

पैहले खास-खास खबरां:-

1. प्रधानमंत्री नरेन्द्र मोदी होरें आखेआ ऐ जे वैश्विक आर्थिक संकट दे बावजूद भारतीय अर्थव्यवस्था दी बुनियाद निगगर बनी दी ऐ।
2. भारतीय रिजर्व बैंक ने विदेशी रासपूंजी आकर्षित करने ते एहदे प्रवाह गी जारी रखने लेई विदेशी पोर्ट फोलियो निवेशकें कन्नै जुड़े दे नियमें पर छूट दिती ऐ।
3. राई-बाई ते करसान कल्याण मंत्रालय नै आखेआ ऐ जे मुख्य भरै च “खेत बचाओ”- अभियान कन्नै 9 लकख 42 जहार कोला मते करसान जुड़ी चुके दे न।
4. भारत नै आखेआ ऐ कि पाकिस्तान संयुक्त राष्ट्र सुरक्षा परिषद दी अपनी स्थाई मिम्बरी दा इस्तमाल जम्मू-कश्मीर बारे झूठा प्रचार करने लेई करा रदा ऐ।
5. मौसम विभाग नै अज्ज केरलम ते माहे च तेज बरखा दी चेतावनी दिती दी ऐ - मुख्य दे कैडयें हिस्से च अज्ज अंधी-झकखड़ दे आसार बी दस्से गेदे न।
6. शतरंज च ग्रैंड मास्टर आर. प्रज्ञानंदन नै Oslo च Norway शतरंज खिताब जितिये इतिहास रची दिता ऐ।
7. ते 18एं बरे कोला हेठली उम्री दी भारत दी मर्दे दी हॉकी टीम पाकिस्तान गी 5-3 कन्नै रहाड़यै एशिया कप दे फाइनल च पुज्जी गई ऐ।

<><><><><><>

PM -Surat Visit

प्रधानमंत्री नरेन्द्र मोदी होरें आखेआ जे वैश्विक आर्थिक संकट दे बावजूद भारतीय अर्थबवस्था दी नीह मजबूत बनी दी ऐ। उ'नें आखेआ जे देसैं नै माली बरे 2025-26 च 7 इशारिया 7 फीसद दा मजबूत बाद्दा दर्ज कीता ऐ। मोदी होरें दमन च कल संजा तकरीबन 2 जहार 970 करोड़ रुपें दी विकास परियोजनाएं दी इक श्रृंखला दा शुभारम्भ कीता। इस मौके पर इक बड़्हे किट्ठ गी सम्बोधित करदे होई प्रधानमंत्री होरें आखेआ जे भारत दुनिया दी सब्भनैं शा तेजिया कन्नै बदधी अर्थबवस्थें चा इक ऐ। उ'नें लोकें गी भरोसा दोआया जे मुख्य गरीबें लेई विकास ते कल्याणकारी योजनाएं गी प्राथमिकता दिंदे होई सुधार दी दिशा च अगगे बधोग।

<><><><><><>

RBI -FPI's

भारतीय रिजर्व बैंक नै विदेशी रास पूंजी आकर्षत करने ते इसी जारी रखने लेई विदेशी पोर्ट फोलियो निवेशकें कन्नै जुड़े दे केंई नियमें च छूट दिती ऐ। सरकार आसेआ दिती गेदी रिआयतें गी मलाइयै- इनें जतनें दा मकसद भारतीय दोआर बजार च विदेशी रास पूंजी गी आकर्षत करना ते रपे दी स्थिति गी मजबूत बनाना ऐ। घोषत कीते गेदे नमें बदलावे च केंई प्रतिबंध हटाना- निवेश दिएं उपश्रेणियें गी इक्कै सीमा च रलाना- नमें बांड जोड़ना- दोआर दी सीमा- माली बरे 2027 लेई विदेशी निवेश दी समग्र प्रतिशत सीमा गी बरकरार रखदे होई कुल मौद्रिक सीमा च बाद्दा करना बी शामिल ऐ।

<><><><><><>

Agriculture Ministry –Campaign

राई-बाई ते करसान कल्याण मंत्रालय नै आखेआ ऐ कि मुख्य भरै च अज्ज धोड़ी 9 लख 42 जहार कोला मते करसान “खेत बचाओ”- अभियान कन्नै जुड़ी चुके दे न। रसैनी ते देसी हैलें दा संतुलित तरीके नै इस्तेमाल करने गी बढ़ावा देने लेई शुरु कीती गेदा एह देश व्यापी अभियान हुन इक जन आंदोलन दा रूप लै करदा ऐ। मंत्रालय मुजब इस अभियान दे तैहत अर्जे धोड़ी 17 जहार 800 कोला मते जागरूकता कैम्प लोआए जाई चुके देन- जिंदे च लोकें टकोहदा करिये करसानें मते जोश ते उत्साह कन्नै हिस्सा लैता ऐ ते इंदे ने 7 लख कोला मते करसानें गी फैयदा पुज्जा ऐ। इस अभियान दा मकसद मुख्यै च मिट्टी दे नरोएपन गी बनाई रखने ते रसैनी हैलें दी बरतून घट्ट करिये टिकाऊ खेती गी बढ़ावा देना ऐ।

<><><><><><>

Pak- UNSC India

भारत नै आखेआ ऐ जे पाकिस्तान संयुक्त राष्ट्र सुरक्षा परिषद दी अपनी अस्थाई सदस्यता दा इस्तेमाल जम्मू-कश्मीर दे बारे च झूठे दावे फैलाने लेई करा'रदा ऐ। भारत नै चेताआ ऐ जे पाकिस्तान गी अपनी जिम्मेदारियें दा ध्यान रखना चाहिदा। भारत दे स्थाई प्रतिनिधि पी. हरिश होरें आखेआ जे जम्मू-कश्मीर भारत दा अनवुट हिस्सा ऐ हा ते म्हेशा रौहग। पाकिस्तान दे खोखले ब्यान ते झूठे दावे इस सच्चाई गी नैई बदली सकदे। हरिश होरें महासभा च पसिषद दी सालाना रिपोर्ट पर चर्चा दौरान जम्मू-कश्मीर दे बारे च पाकिस्तान दे स्थाई प्रतिनिधि आसिम इफ्तिखार अहमद दे ब्यानै दे परते च भारत दा पख रक्खेआ।

<><><><><><>

IMD Weather

मौसम विभाग नै अज्ज केरलम ते माहे च तेज बरखा ते किश थाहरें पर बड़ी मती बरखा दी चेतावनी जारी कीती ऐ। उत्तर पूर्वी भारत- कर्नाटक- तमिलनाडू- पुदुचेरी ते कराईकल दे किश हिस्से च बी अज्ज मोलाधार बरखा दे असार दस्से गे न। उप-हिमाली पच्छमी बंगाल- तेलंगाना- कोकण- गोवा- मध्य महाराष्ट्र- राँयल सीमा- अंदमान निकोबार द्वीप समूह ते लक्षदीप च बी मौसम इस्से चाल्ली दा बने रौहने दे आसार दस्से गे न। मौसम विभाग नै अज्ज दिल्ली- हरियाणा- चंडीगढ़- पंजाब- उत्तराखंड- पूर्वी उत्तर प्रदेश- मध्य प्रदेश- झारखंड ते जम्मू-कश्मीर च बिजली कड़कने ते तेज अंधी झक्खड़ औने दी बी शैकां जताई गेदी ऐ। तोंआई बिहार-छत्तीसगढ़- ओडिशा ते राजस्थान च बी अज्ज अंधी-झक्खड़ आहला मौसम बने दा रौहग- जिसले के आंध्र प्रदेश दे समुन्द्रे कन्नै लग्गदे इलाके च अज्ज गर्म बहा चलने दे असार दस्से गेन।

<><><><><><>

Chess -Praggnanandha

शतरंज च ग्रैंड मास्टर R. Praggnanandha होरें Oslo च Norway शतरंज खिताब जित्तिये इतिहास रची दिता ऐ। प्रज्ञानंद होरें अखीरले दौर च जर्मनी दे Vincent Keymer होरें गी हराया। एह खिताब जित्तने आले ओह पैहले भारतीय बनी गे न। त्री थाहरे सोआं दिन दी शुरुआत करने मगरा प्रग्नानंद होरें महत्वपूर्ण क्लासिकल जित्त कन्नै त्रै अंक हासल कीते ते 18 अंके कन्नै खिताब अपने नांs करी लेआ।

<><><><><><>

Hockey U-18 Asia Cup

भारत दी 18एं बरे कोला हेठली उमरी दे मर्दे दी टीम ने कल इक शानदार सेमीफाइनल मकाबले च पाकिस्तान गी 5-3 कन्नै हराइयै फाइनल च प्रवेश कीता। इक समे च भारतीय टीम 2-3 कन्ने पिच्छे ही पर खीरी 15एं मिंटे च शानदार प्रदर्शन करदे होई टीम ने 3 गोल करियै मैच दा रौंस गै बदली दिता। इस जित दे नायक आशीष तनी पूर्ति गी आखेआ जाई सकदा ऐ जिनें 4 गोल कीते। इस जित दे बाद खताबी मकाबले च भारत दा मकाबला मेजबान जापान कन्नै होग। जिन्नै पैहले सेमीफाइनल च मलेशिया गी 8-1 कन्नै हराया।

<><><><><><>

ते हून क्रिकेट

भारत ते अफगानिस्तान बश्कार इक्क मातर टैस्ट मैच अज्ज 6 जून सवां मुल्लांपुर-न्यू चंडीगढ़ दे महाराजा यादविंदर सिंह इंटरनैशनल क्रिकेट स्टेडियम च शुरु होने जा'रदा ऐ। बड्लै साइडे 9 बजे शुरु होआ रदा एह रेड बॉल टैस्ट मैच विश्व टैस्ट चैम्पियनशिप दा हिस्सा नैई ऐ। रोहित शर्मा ते विराट कोहली गी रेस्ट दिते जाने दे बाद शुभमन गिल भारती टीम दी कप्तानी करा'रदे न ते के. एल. राहुल गी इस टैस्ट मैच लेई उप-कप्तान बनाया गेआ ऐ। मैहमान टीम दी कप्तानी हशमत उल्लाह शाहिदी करा करदे न। इस टैस्ट मैच दे बाद दौने टीमैं बश्कार 3 इक्क रोजा अंतराष्ट्रीय मैचें दी श्रृंखला बी खेड्ढी जाहग। 2018 दे बाद भारत ते अफगानिस्तान बश्कार एह पैहला टैस्ट मैच ऐ।